



REGIONE AUTONOMA DELLA SARDEGNA

SARDU, FUEDDA SARDU

A totus is tuilesus,

de una pariga de mesis est abertu in su Comunu de custa biddu, s'**Uficiu Lìngua Sarda** (ULS).

Meda genti s'at a nai: ma ita nci fait imoi custu ufìciu nou? A ita serbit? Nosu scireus giai chistionai su sardu e cun su Comunu eus sempri fatu comentu si beniat prus a beni: a bortas eus chistionau su sardu, atras bortas s'italianu.

Duncas, poita s'ULS?

Po nosu sardus, sa língua sarda est una cosa meda importanti: **su sardu si connoscit po primu po sa língua** difatis. De unu pagheddu de tempus a oi perou a pagu a pagu est sperdendusì: at a essi nexi de sa scola, de sa televisioni, de su chi boleis, ma custa est sa beridadi.

Su sardu perou no est mortu incora. In medas ddu fueddaus e giai totus ddu cumprendeus, sceti ca eus abandonau meda funtzionis chi custa língua in unu tempus teniat: in su traballu, in butega, in sa vida de dònnia ddi. Po nai: **de cantu est chi no intendeis prus sa grida ghetada in sardu? De cantu est chi su butegheri no si pedit ita boleis in sardu?**

Medas eis a arrespundi: imoi nc'est s'italianu ca est una língua moderna e andat prus a beni po custas cosas. Ma seus sigurus ca su sardu no podit tenni prus custas funtzionis?

Su traballu de s'Uls est cussu de agiudai sa genti a torrai a fueddai su sardu sempri, a torrai a donai a su sardu cussu chi at pèrdiu, a torrai, comentu narant is linguistas, a una cundizioni de "diglossia" (una comunidadi chi chistionat paris duas línguas).

Comentu eus pentzau de fai?

Eus pentzau ca sa debilesa prus manna de sa língua sarda est ca in **pagus dda scint ligi e scriri**, cosas chi in s'antigòriu serbian pagu, mentris in ddi de oi funt de importu mannu.

- Po cussu eus organizau su "**Cursu de Língua Sarda**", unus cantu atóbuis anca eus chistionau de comentu scriri e ligi su sardu, donau cunsillus e agiudus po impreai su sardu fintzas me in is paperis.
- Po cussu seus **scriendi in sardu is avisus de su Comunu**, cancunu si ddu eus mandau a domu, atrus ddus agatais in su giassu "www.sabertulantiga.com".

Custu est su chi fait e podit fai s'Uls, **totu s'atru est a bosatrus**: fueddai su sardu candu e cantu si praxit, chistionai-ddu cun is fillus, cun is amigus, in su Comunu, in sa scola e chi ndi teneis praxeri, sciei puru in custa língua chentza de timi de sballiai o de fai dannu, ca **est sa língua de bosatrus nci bollit pagu a dda imparai!**